



Молебен о без вести сущих

Благословен Бог наш:

Чтец: Слава Тебе, Боже наш, слава Тебе.

Царю Небесный: Трисвятое по Отче наш. Приидите, поклонимся: (трижды).

Псалом 112

Хвалите, óтроцы, Гóспода, хвалите íмя Госпóдне. Бúди íмя Госпóдне благословéно отнынѣ и до вѣка. От востóкъ сóлнца до зáпадъ хвáльно íмя Госпóдне. Высóкъ надъ всѣми языки Госпóдь: надъ Небесы́ слава Егó. Ктó яко Госпóдь Бóгъ нáшъ? На высóкихъ живый, и на смиренныя призира́й на Небеси́ и на земли́: воздвизáяй от земли́ ни́ща, и от гнóбща возвышáяй убо́га: посадíти егó съ князи, съ князи людíй своíхъ: вселяя непло́довъ въ дóмъ, мáтерь о чáдѣхъ веселя́щуся.

Слава, и ныне.

Аллилуия, аллилуия, аллилуия, слава Тебе, Боже. (Трижды)

Мирная ектенія:

Миром Господу помолимся.

О свышнем мире, и спасении душ наших, Господу помолимся.

О мире всего мира, благостоянии святых Божиих церквей, и соединении всех, Господу помолимся.

О святем храме сем, и с верою, благоговением и страхом Божиим входящих вонь, Господу помолимся.

О православном епископстве Русския Зарубежныя Церкви, о господине нашем Высокопреосвященнейшем митрополите Агафангеле, первоиерарсе Русския Православныя Церкви Заграницей, о господине нашем Преосвященнейшем [архиепископе, или епископе, имярек, егоже область], честнем пресвитерстве, во Христе диаконстве, о всем причте и людех, Господу помолимся.

О страждущей стране нашей и православных людех ея, во отечестве и разсеянии сущих и о спасении их, Господу помолимся.

О еже избавити люди своя от враг видимых и невидимых, в нас же утвердити единомыслие, братолюбие и благочестие, Господу помолимся.

О еже непомянути грехи и беззакония наша, но милостиву нам быти, недостойным рабом Своим в бедáх сущим, и избавити нас от врагов наших, Господу помолимся.

О еже взыскати без вести сущих ближних наших (имярек), в вере истинней их укрепити и целых и здравых явити, Господу помолимся.

О еже явити нам без вести сущих ближних наших (имярек) и воедино совокупити с верными рабами Своими, Господу помолимся.

О еже пременити всю скорбь и сетование наше на радость и веселие, ближних взыскати, и Церковь нашу непребориму от всех вражиих наветов всегда сотворити, Господу помолимся.

О еже умирити Церковь Свою святую, и невредиму и непоколебиму ю соблюсти от всякаго злаго обстояния всех сопротивных апостат, Господу помолимся.

О еже мир и славу вселити в земли нашей, искоренити вся ереси и отступления, и насадити всюду благочестие и правоверие, Господу помолимся.

О еже обратити всех отступльших и заблудших от истины, к познанию православныя веры, и сопричтити их избранному Своему стаду, Господу помолимся.

О избавитися нам от всякия скорби, гнева и нужды, Господу помолимся.

Заступи, спаси, помилуй, и сохрани нас Боже, Твоею благодатию.

Пресвятую, Пречистую, Преблагословенную, славную Владычицу нашу Богородицу и Приснодеву Марию, со всеми святыми помянувше, сами себе, и друг друга, и весь живот наш Христу Богу предадим.

Возглас: Яко подобает Тебе всякая слава честь и поклонение, Отцу и Сыну и Святому Духу, ныне и присно, и во веки веков. Аминь.

"Бог Господь", глас 1-й.

Бог Господь и явися нам, благословен Грядый во имя Господне.

стих 1: Исповедайтеся Господеву, яко Благ, яко в век милость Его.

стих 2: Обышедше обыдоша мя, и именем Господним противляхся им.

стих 3: Не умру, но жив буду и повею дела Господня.

стих 4: Камень, егже небрегоша зиждущии, сей бысть во главу угла, от Господа бысть сей, и есть дивен во очесех наших.

Тропарь, глас 6-й:

Помилуй нас, Господи, помилуй нас; всякаго бо ответа недоумюще, сию Ти молитву яко Владыце грешнии приносим: помилуй нас.

Сла́ва: Го́споди, поми́луй нас, на Тя бо упова́хом; не прогне́вайся на ны зело́, ниже́ помяни́ беззако́ний на́ших, но при́зри и ны́не яко́ благоутро́бен, и изба́ви ны от враг на́ших; Ты бо еси́ Бог наш, и мы лю́дие Твои́, вси дела́ руку́ Твое́ю, и и́мя Твое́ призыва́ем.

И ны́не: Милосе́рдия двэри отvéрзи нам, благослове́нная Богоро́дице, наде́ющиися на Тя да не поги́бнем, но да изба́вимся Тобо́ю от бед: Ты бо еси́ спасе́ние ро́да христиа́нского.

Канон

Егоже припевы:

Слава Тебе, Боже наш, слава Тебе!

Пресвятая Богородице, спаси нас!

Святой мучениче Иоанне Воине и преподобнии Ксенофонте и Марие, молитесь Бога о нас!

Многомилостиве Господи, услыши молитву рабов Своих!

Слава, и Ныне.

Катавасия по каждой песни:

Избави от бед,/ рабы Твоя, Многомилостиве Господи,/ яко мы усердно/ к Тебе прибегаем,// Милостивому Избавителю всех Владыце Господу Иисусу.

Спаси от бед/ рабы Твоя, Богородице,/ яко вси по Бозе/ к Тебе прибегаем,// яко нерушимой стене и предстательству.

Призри благосердием,/ Всепетая Богородице,/ на мое лютое/ телесе озлобление// и исцели души моя болезнь.

Молите Бога о нас,/ мучениче Иоанне Воине и преподобнии Ксенофонте и Марие,/ яко мы усердно/ к вам прибегаем,// скорым помощникам и молитвенникам о душах наших.

Премудрость, вонмем, Прокимен, глас 4:

Господь крепость людем своим да́ст, Господь благословит лю́ди Своя ми́ром.

Стих: Принесите Господеви, сынове Божи, принесите Господеви сыны овни.

Ко Евреям послание святаго апостола Павла чтение. Вонмем.

Апостол ко Евреям, зач. 333 (Евр 12.28-13.8).

Бра́тие, ца́рство непоколеби́мо прие́млюще, да и́мамы благода́ть, еюже служи́м благоуго́дно Бо́гу с благоговéнием и стра́хом, и́бо Бог наш огонь пояда́й есть. Братолю́бие да пребыва́ет. Страннолю́бия не забыва́йте, тем бо не ве́дающе не́цыи странноприя́ша а́нгелы. Помина́йте ю́зники, а́ки с ни́ми связа́ни:

озлобляемые, аки и сами суще в теле. Честна женитва во всех и ложе нескверно, блудником же и прелюбодеем судит Бог. Не сребролюбцы нравом, довольни сущими. Той бо рече: не имам тебе оставити, ниже имам от тебе отступити. Яко дерзающим нам глаголати: Господь мне помощник, и не убоюсь, что сотворит мне человек? Поминайте наставники ваша, иже глаголаша вам слово Божие, иже взирающе на скончание жительства, подражайте вере их. Иисус Христос вчера и днесь, Тойже и во веки.

Иерей: Мир ти.

Чтец: И духови твоему.

Премудрость, прости услышим Святаго Евангелия. Мир всем.

Лик: И духови твоему.

От Матфея Святаго Евангелия чтение.

Лик: Слава Тебе, Господи, слава Тебе.

Вонмем.

Евангелие от Матфея, зач. 20 от полу (7.7-11).

Рече Господь: просите и дастся вам; ищите и обрящете; толцые, и отверзется вам. Всяк бо просяй приемлет, и ищяй обретает, и толкущему отверзется. Или кто есть от вас человек, егоже аще воспросит сын его хлеба, еда камень подаст ему? Или аще рыбы просит, еда змию подаст ему? Аще убо вы лукави суще, умеете даяния блага даяти чадом вашим: кольми паче Отец ваш Небесный даст блага просящим у Него.

Лик: Слава Тебе, Господи, слава Тебе.

Сугубая ектения:

Помилуй нас, Боже, по велицей милости Твоей, молимся Тебе, услыши и помилуй.

лик: Господи, помилуй (трижды).

Еще молимся Тебе, Господу и Богу нашему, о рабах Божиих, (имярек), без вести сущих, и о еже избавити их от всякаго навета вражия и насилия лютаго, сохраняюще их в крове благодати Твоея, молим Ти ся, услыши и помилуй.

Еще молимся о еже простити им вся прегрешения вольная и невольная, и явити на них великую Твою милость, Христэ Боже, радость сретения с ближними неизреченную им дарующе, молим Ти ся, услыши и помилуй.

Ещё молимся упованию нашему не посрамлену быти, во еже не умрети рабом Твоим, (имярек), но мирно в дома своя возвратитися им, сродникам во утешение, наипаче же к славе Имене Твоего, Господи, молим Ти ся, услыши и помилуй.

Возглас: Услыши ны, Боже, Спасителю наш, упование всех концев земли, и сущих в мори далече, и милостив, милостив буди, Владыко, о гресех наших, и помилуй ны: Милостив бо и Человеколюбец Бог еси, и Тебе славу возсылаем, Отцу, и Сыну, и Святому Духу, ныне и присно, и во веки веков.

И по возглашении: Со умилением паки и паки (преклоньше колена), Господу помолимся.

Лик: Аминь.

Господу помолимся.

Лик: Господи, помилуй.

Молитва Господу нашему Иисусу Христу о без вести сущих

Владыко, Господи Боже наш, всем человеком хотяй спастися и в познание истины приити! Не отврати лица Твоего от припадающих к Тебе в скорби и печали, но милостивно услыши вопль рабов Твоих, плачущих о ближних [или: о чадах; или: о сродницех] своих (имярек), без вести сущих, и благодатию Своею ороси сердца молящихся, утешение и ободрение им дарующе! Да будет воля Твоя, Боже, благая и всесовершенная! Аще живи без вести сущии ближние наши, яко заблудшее овча, обрети их, и к нам возврати, радость чаемую сретения дарующе. Яко чадо отчее, иже мертв бе и оживе и иже погибал еси на стране далече, и обретесе, сохрани их, Господи, и к нам возврати, радость нам дарующе! Аще же сий течение земное совершиша, в селениях праведных вечныя души их учини, нас же научи смиренно приимати сие промышление о них, скорбящая утеши и радость с Небес им низпосли. Твое бо есть еже миловати и спасати ны, Боже наш, и Тебе славу возсылаем, Отцу, и Сыну, и Святому Духу, ны не и присно, и во веки веков. Аминь.

Молитва ко Пресвятей Богородице о без вести пропавшем

О, Всесвятая Владычице Богородице, Взыскание погибших, странных Питательнице и заблудших Путеводительнице! Без вести пропавшего [имярек], о немже не имама извещения, покрый честным Твоим омофором, сохрани от всех напастей вражиих, избави

пленения и лютыя смерти, от отчаяния огради. Приими Владычице молитву рабов Своих, и избави нас от всякия нужды и печали. Ты еси Богородице, заступнице, оружие наше и стена! К Тебе прибегаем, Тя и ныне на молитву призываем, да избавиши ны от враг наших. Аминь.

Молитва мученику Иоанну Воину

О, великий Христов мучениче Иоанне, православных поборниче, врагов прогонителю и обидимых заступниче! Услыши нас, в бедях и скорбех молящихся тебе, яко дана тебе бысть благодать от Бога печальныя утешати, немощным помогати, неповинныя от напрасныя смерти избавляти и за всех зле страждущих молитися. Буди убо и нам поборник крепок на вся видимыя и невидимыя враги наша, яко да твоєю помощью и поборством по нас посрамятся вси являющии нам злая. Умоли Господа нашего, да сподобит ны, грешныя и недостойныя рабы Своя (имена), получитьи от Него неизреченная благая, яже уготовал любящим Его, в Троице Святей славимаго Бога, всегда, ныне и присно и во веки веков. Аминь.

Молитва преподобным Ксенофону и Марии

О, святии Ксенофонте и Марие со чадами вашими Аркадием и Иоанном! Се, мы недостойнии и грешнии к вам усердно прибегаем и с упованием крепким молимся: милостивно услышите ныне глас наш молебный и потщитесь на помощь нашу, и ныне любовь вашу к нам, рабам Божиим (имена), явите благодатным действием богоприятных молитв ваших, низпошлите и нам великую и богатую милость Господню, да воспоем и прославим дивнаго во святых Своих Бога, Отца и Сына и Святаго Духа, ныне и присно и во веки веков.

Премудрость. Пресвятая Богородице, спаси нас.

Честнейшую Херувим/ и славнейшую без сравнения Серафим,/ без истления Бога Слова рождшую, // сущую Богородицу Тя величаем.

Слава Тебе, Христе Боже, Упование наше, слава Тебе.

Слава, и ныне. Господи, помилуй (трижды). Благослови.

Отпуст: Христос, истинный Бог наш, молитвами Пречистыя Своея Матери, силою Честнаго и Животворящаго Креста; святых славных и всехвальных Апостолов; святаго мученика Иоанна Воина, преподобных Ксенофонта и Марии, и всех святых Своих, помилует и спасет нас, яко благ и человеколюбец. Аминь.